

Ilaqutariit paarsisartut pillugit Namminersorlutik Oqartussat nalunaarutaat nr. 13, 10. oktober 2019-imeersaq

Meeqqat tapersorneqarnissaannut Inatsisartut inatsisaanni nr. 20, 26. juni 2017-imeersumi § 37, imm. 7, § 39, imm. 6, aamma § 42, imm. 7, malillugit uku aalajangersarneqarput:

Kapitali 1

Ilaqutariit paarsisartut

§ 1. Qanigisaasutut ilaqutariit paarsisartut tassaapput ilaqutariit namminneq angerlarsimaffimmini meeqqamut aalajangersimasumut qanigisaanertik pissutigalugu paarsisartut, meeqqamik isumassuisuullutillu paarsisuusut, imaluunniit Meeqqat tapersorneqarnissaannut Inatsisartut inatsisaat malillugu imaluunniit Inuit innarluutillit tapersorneqarnissaannut Inatsisartut inatsisaat malillugu oqilisaassivimmiittussamik isumassuisuullutillu paarsisuusut.

Imm. 2. Qanigisaasutut ilaqutariit paarsisartut angajoqqaatut oqartussaassuseqartumik ilaqutariillu inoqutaannik allanik ulloq unnuarlu najugaqartitsisinnaapput.

Imm. 3. Imm. 1 malillugu qanigisaasutut ilaqutariit paarsisartut inuusuttumik suliniuteqareermermi malitseqartitsilluni suliniuteqarfigineqartumik, imm. 1 malillugu ilisimariikkaminnik, najugaqartitsisinnaapput.

§ 2. Kommuniip aaqqissuussaanik ilaqutariit paarsisartut tassaapput ilaqutariit meeqqamik ilaqutariinnut inissinneqarsimasumik, imaluunniit Meeqqat tapersorneqarnissaannut Inatsisartut inatsisaat malillugu imaluunniit Inuit innarluutillit tapersorneqarnissaannut Inatsisartut inatsisaat malillugu oqilisaassivimmiittussamik isumassuisuullutillu paarsisuusut.

Imm. 2. Ilaqutariit paarsisartut angajoqqaatut oqartussaassuseqartumik ilaqutariillu inoqutaannik allanik ulloq unnuarlu najugaqartitsisinnaapput.

Imm. 3. Ilaqutariit paarsisartut inuusuttumik suliniuteqareermermi malitseqartitsilluni suliniuteqarfigineqartumik najugaqartitsisinnaapput.

§ 3. Kommuniip aaqqissuussaanik inuusutissarsiutigalugu ilaqutariit paarsisartut tassaapput ilaqutariit paarsisartut arlaat pinngitsoorani isumaginninnermik ilinniarsimasuusoq allatulluunniit isumaginninnermut sanilliunneqarsinnaasumik misilittagaqartuusoq.

Imm. 2. Angajoqqaarsiat arlaat isumaginninnikkut assigisaanilluunniit ilinniarsimasuusoq, piffissami meeqqap paarineqartup meeqqalluunniit paarineqartut ulluunerani paaqqinnittarfimmiinneranni

atuarneranniluunniit, taamaallaat allamik inuussutissarsiuutigalugu suliffeqarsinnaasoq.

Kapitali 2

Ilaqutariinnut paarsisartunut akuersissut

§ 4. Ilaqutariit paarsisartut ilaqutariittut paarsisartutut akuersissummik peqarunik aatsaat meeqqamik tiguisinnaallutillu paarsaqarsinnaapput.

Imm. 2. Ilaqutariittut paarsisartutut akuersissut kommunimi ilaqutariit paarsisartut najugarisaanni kommunalbestyrelsimit tunniunneqassaaq.

Imm. 3. Ilaqutariittut paarsisartutut akuersissut allakkatigut tunngavilersorlugu nalunaarutigineqassaaq. Ilaqutariit paarsisartut meeqqamik inuusuttunillu qassinik tiguisinnaanerit ilaqutariittut paarsisartutut akuersissummi allaqqassaaq.

§ 5. Ilaqutariinni qinnuteqartuni pissutsit ataatsimoortillugit misissuineq tunuliaqutaralugu, kommunalbestyrelsip ilaqutariittut paarsisartutut akuersissummik tunniussinissaq aalajangiiffigissavaa. Ilaqutariit pineqartut meeqqamik inuusuttumilluunniit ataatsimik arlalinnilluunniit paarsassanik tigusinissamut qanoq naleqqutsiginersut Kommunalbestyrelsip misissuinermini nalilissavaa.

Imm. 2. Imm. 1 malillugu kommunalbestyrelsip misissuinermini pissutsit ilaatigut makkua ilaqutariit qanoq naleqqutsiginerannik naliliinermi ilanngutissavai:

- 1) Ilaqutariinni ilaqutariittut pissutsit.
- 2) Ilaqutariinni ilinniagaqarneq pillugu pissutsit.
- 3) Ilaqutariinni suliffeqarneq pillugu pissutsit.
- 4) Angajoqqaat inooqatigiinnerat.
- 5) Angajoqqaat ukiui.
- 6) Angajoqqaat meeraqarsimappata meeraat, matumani qassiuneri ukiuilu ilanngullugit.
- 7) Ilaqutariit attaveqarfii.
- 8) Ilaqutariit ineqarneranni pissutsit, matumani angerlarsimaffik peqqinnissaq eqqarsaatigalugu isumannaatsuunersoq ilanngullugu.
- 9) Ilaqutariit angerlarsimaffiata avatangiisii, matumani sunngiffimmi periarfissat, atuarfik il.il.
- 10) Ilaqutariinni peqqissutsimut pissutsit.
- 11) Pinerluutillit suliarineqarnerat pillugu pissutsit.
- 12) Ilaqutariit aannngajaarniutinik atuinerat pillugu pissutsit.
- 13) Ilaqutariit aningaasaqarnerat pillugu pissutsit.
- 14) Angajoqqaat perorsaaneq pillugu isumaat.
- 15) Ilaqutariit paarsisinnaanermik akuersissummik qinnuteqarnerat sumik tunngaveqarlunilu pissuteqarnerasoq.

Imm. 3. Ilaqutariit inuussutissarsiuutigalugu paarsisartuunissamik qinnuteqarsimappata, angajoqqaat arlaat pinngitsoorani isumaginninnermik ilinniarsimasuunersoq allatulluunniit isumaginninnermut

sanilliunneqarsinnaasumik misilittagaqartuunersoq kommunalbestyrelsip aammattaaq nalilissavaa.

Imm. 4. Imm. 2, nr. 10 malillugu ilaqutariinni, tamanna naliliinermut atatillugu pisariaqarsorineqarpat, inoqutaasut ilaat 1 arlaqartulluunniit peqqissutsimut uppernarsaammik kommunalbestyrelsip qinnuigisinnaavai. Peqqissutsimut uppernarsaat qaammatinit 3-nit pisoqaanerussangilaq.

Imm. 5. Imm. 2, nr. 11 malillugu naliliinermut atatillugu Pinerluuteqarsimasunik Nalunaarsuiffimmit uppernarsaammik kiisalu ilaqutariinni inoqutaasunut 15-inik taakkualuunniit sinnerlugit ukiulinnut tamanut tunngatillugu meeqqanik pinerliisimanginnermut uppernarsaammik kommunalbestyrelse piniassaaq.

Imm. 6. Imm. 2, nr. 12 malillugu naliliinermut atatillugu aanngajaarniutitik atuisuunermik misissuineq kommunalbestyrelsip aallartissavaa. Kommunalbestyrelse, massuma aallartinnginnerani inummut aanngajaarniutitik atuisuunermik misissorneqartussamut, allakkatigut akuersissummik piniassaaq. Aanngajaarniutitik atuisuunermik misissuinissamik nalunaaruteqarneq tamatigut peqqinnissaqarfimmi najoqqutassat nalinginnaasut malillugit pissaaq.

Imm. 7. Imm. 2, nr. 13 malillugu kommunalbestyrelsip ilaqutariit aningaasaqarnerat meeqqat inuusuttullu ilaqutariinnit paarineqartussatut inissinneqartut aalajaatsumik atugaqarnissaannik tunngavissiiunersoq naliliinermut atatillugu qulakkiissavaa.

§ 6. Kommunalbestyrelse ilaqutariinnut paarsisartunut akuersissuteqarnissamini piumasagaatinik aalajangersaasinnaavoq. Makkua pillugit piumasagaatit aalajangersarneqarsinnaapput:

1) Ilaqutariinni paarsisartuni pissutsit.

2) Meeqqat inuusuttullu ilaqutariit paarsassamissut tigusinnaasaasa amerlassusissaat.

3) Meeqqat inuusuttullu ilaqutariit paarsassamissut tigusinnaasaasa qanoq pisariaqartitsitiginissaat.

Imm. 2. Imm. 1 malillugu piumasagaatit siunertaasumit nanertuutaanerussangillat.

§ 7. § 4, imm. 2 malillugu kommunalbestyrelsimut ilaqutariittut paarsisartuunissamut akuersissuteqartumut §§ 1-3 malillugit ilaqutariit paarsisartut ilaqutariinni pissutsit pillugit allannguuteqartoqartillugu kommunalbestyrelsimut piaartumik nalunaaruteqarnissamut pisussaaffeqarput.

Ilaqutariittut paarsisartutut akuersissummik utertitsineq

§ 8. § 4 malillugu ilaqutariit paarsisartut, kommunalbestyrelsip ilaqutariit najugaqarfigisaaniittup, akuersissummi piumasagaatit atuukkunnaarsimappata, akuersissut utertinneqassanersoq aalajangiiffigissavaa.

Imm 2. Ilaqutariittut paarsisartutut akuersissutip utertinneqarnissaa kommunalbestyrelsip ilaqutariinnik paarsisartunik nakkutilliineranut atatillugu, imaluunniit kommunalbestyrelsip ilaqutariittut paarsisartutut akuersissummi piumasagaatit atuukkunnaarsimanerat allatigut paasippagu, atorunnaarsinneqarsinnaavoq.

Imm 3. Kommunalbestyrelsip, ilaqutariittut paarsisartutut akuersissutip utertinneqarnissaanik aalajangiisup, kommunalbestyrelse kommunalbestyrelsilluunniit, meeqqamik inuusuttumilluunniit ilaqutariinnut inissiinissamik aalajangiisimasut, sapinngisamik piaarnerpaamik ilisimatissavai.

Imm 4. Kommunalbestyrelsip ilaqutariittut paarsisartutut akuersissummik utertitsinissamik aalajangiinermini, meeqqap, inuusuttup, meeqqat inuusuttulluunniit ilaqutariinnit paarsarineqartut nuutsinneqarnissaannut piffissaliusaaq naammaginatut sivilissusilik aalajangissavaa. Meeqqap inuusuttulluunniit ukiuminut naleqquttumik sutigut tamatigut alliarturneranut, peqqissusaanut ineriartorneranullu naleqquttumik, nutaanik inissiivissamik tulluurtunik nassaarnissaaq kiisalu pissutsit ilaqutariittut paarsisartutut akuersissummik utertinneqarnissaanut pissutaasut eqqarsaatigalugit, piffissaliusaaq aalajangerneqassaaq.

§ 9. Ilaqutariit paarsisartut pikkorissarnerni ilinniaqqinnernilu §§-ini 16-imi 17-imilu pineqartuni peqataasarnissamik piunasaqaatinik eqquutsitsinnigippata, ilaqutariittut paarsisartutut akuersissutip utertitsinneqarnissaa kommunalbestyrelsip aalajangissavaa.

Imm. 2. Imm. 1 malillugu utertitsinissamik aalajangiisoqannginnerani ilaqutariit paarsisartut, pikkorissarnerni ilinniaqqinnernilu §§-ini 16-imi 17-imilu pineqartuni peqataasarnissamik piunasaqaatit qanoq eqquutsinneqarsinnaanerat pillugu kommunalbestyrelsip oqaloqatigeqqaassavai.

Imm. 3. Imm. 1 malillugu ilaqutariittut paarsisartutut akuersissutip utertitsinissaanik aalajangiinermini § 8, imm. 4 atuutissaaq.

§ 10. Ilaqutariit paarsisartut piffissami ukiunik pingasunik sivilissusilik meeqqamik inuusuttunilluunniit paarsaqarsimannigippata, ilaqutariittut paarsisartutut akuersissutip utertitsinissaa kommunalbestyrelsip aalajangissavaa.

Kapitali 3

Paarsisinnaanermut akuersissut aamma ilaqutariittut paarsisartuni inissiinermut isumaqatigiissut

Paarsisinnaanermut akuersissut

§ 11. Kommunip aaqquissuussaanic ilaqutariit paarsisartut, meeqqamut inuusuttumilluunniit pineqartumut paarsisinnaanermut akuersissummik peqarunik aatsaat, meeqqamik ataatsimik tiguisinnaallutillu paarsisinnaapput.

Imm. 2. Paarsisinnaanermut akuersissut allakkatigut tungavilersorlugu nalunaarutigineqassaaq.

§ 12. Kommunalbestyrelsip paarsisinnaanermut akuersissummik tunniussaqaarnissamik aalajangiinermini, ilaqutariit pineqartut meeqqap inuusuttulluunniit aalajangersimasup tapersorneqarnissamik, isumassorneqarnissamik paarineqarnissamillu pisariaqartitaanik

naammassinninnissamat qanoq naleqqutsiginerat nalilissavaa. Kommunalbestyrelsip naliliinermini ilaatigut makku ilanngutissavai:

- 1) § 4, imm. 3 malillugu ilaqutariit meeqqat inuusuttullu paarsarisinnaasaasa amerlassusiat, ilaqutariittut paarsisartutut akuersissummi allassimasoq.
- 2) Meeqqat inuusuttullu ilaqutariinni paarsisartuni inissinneqareersimasut amerlassusaat.
- 3) Meeqqap inuusuttulluunniit tapersersorneqarnissamik, isumassorneqarnissamik paarineqarnissamillu pisariaqartitai.
- 4) Ilaqutariit meeqqap inuusuttulluunniit tapersersorneqarnissamik, isumassorneqarnissamik paarineqarnissamillu pisariaqartitaanik naammassinninnissaannut piginnaasaat.
- 5) Meeqqap inuusuttulluunniit inatsisit allat naapertorlugit tapersersorneqarnissamik pisariaqartitsinera, meeqqap inuusuttulluunniit ilaqutariinni paarsisartuni taamatut tapersersorneqarnissaminut periarfissai.

§ 13. § 12 malillugu ilaqutariit paarsisartut ilaqutariinni pissutsinik allannguuteqartoqartillugu, kommunalbestyrelsimut imaluunniit kommunalbestyrelsinut meeqqamut inuusuttumulluunniit aalajangersimasumut ilaqutariittut paarsisartuunissamat akuersissummik tunniussisumut tunniussisunulluunniit, piaartumik nalunaaruteqarnissamat pissaaffeqarput.

Paarsisinnaanermut akuersissutip utertinneqarnissaa

§ 14. § 12 malillugu paarsisinnaanermut akuersissummi piumasaqaatit atuukkunnaarsimappata, matumani pingaartumik aamma meeqqap inuusuttulluunniit najugaqarnini iluaqutiginnippagu, akuersissutip utertitsinneqarnissaa kommunalbestyrelsip inissiisup aalajangiiffigissavaa.

Imm. 2. Meeqqat tapersersorneqarnissaannut Inatsisartut inatsisaanni § 8, imm. 2 malillugu, meeqqap inuusuttulluunniit ilaqutariinni najugaqarnerani kommunalbestyrelsip nakkutilliineranut atatillugu, imaluunniit paarsisinnaanermut akuersissummi piumasaqaatit atuukkunnaarsimanerat allatigut paasippagu, akuersissutip utertitsinneqarnissaa kommunalbestyrelsip aalajangiiffigisinnaavaa.

Imm. 3. Kommunalbestyrelsip paarsisinnaanermut akuersissutip utertitsinneqarnissaanik aalajangiisup, kommunalbestyrelse ilaqutariinnut paarsisartunut akuersissummik ilaqutariinnut tunniussisimasoq tuaviernerpaamik ilisimatissavaa.

Imm. 4. Kommunalbestyrelsip paarsisinnaanermik akuersissummik utertitsinissamik aalajangiinermini, meeqqap inuusuttulluunniit ilaqutariinnit paarsarinqartup nuutsinneqarnissaanut piffissaliussaq naammaginantumik sivilissusilik aalajangiiffigissavaa. Meeqqap inuusuttulluunniit pisariaqartitaanut naapertuuttumik piffissaliussaq inissinneqassaaq, meeqqamik inuusuttumilluunniit inissiivissatut naleqquttumik nassaarsinnaaneq, kiisalu pissutsit paarsisinnaanermut akuersissummik utertitsinermut pissutaasut eqqarsaatigalugit aalajangerneqassaaq.

Imm. 5. Meeqqap inuusuttulluunniit atugarissaarneranut, peqqissusaanut imaluunniit ineriartorneranut ajoqutaasumik, tunngavilersukkamik pasitsaassineq tunngavigalugu, kommunalbestyrelsip meeraq inuusuttorluunniit erngerluni ilaqutariinnit paarsisartunit peersissavaa:

- 1) Meeraq inuusuttorluunniit naammangitsumik isumassorneqarpat imaluunniit pineqarpat,
- 2) timikkut tarnikkulluunniit persuttarneqarpat, paarinerlunneqarpat imaluunniit kinguaassiuutitigut innarlerneqarpat,
- 3) atorerluinermik ajornartorsiuteqartoqarpat, meeqqami inuusuttumiluunniit imaluunniit taakku qanittumik avatangiisigisaanni pinerluttoqartarpat imaluunniit inooqutigiinni annertuunik allanik ajornartorsiuteqartoqarpat, imaluunniit
- 4) meeqqap inuusuttulluunniit imaluunniit taakku qanittumi avatangiisaanni pissusilersornikkut-imaluunniit naleqqussarniarnermi ajornartorsiuteqarpata.

Ilaqutariittut paarsisartunut isumaqatigiissut

§ 15. Meeqqap inuusuttulluunniit suliniuteqareermermi malitseqartitsilluni suliniuteqarfigineqartup, kommunalbestyrelse pisussaavoq ilaqutariittut paarsisartuni inissiinermut isumaqatigiissutip suliarineqarnissaa atsiortinnissaalu isumagissallugu.

Imm. 2. Ilaqutariittut paarsisartuni inissiinermut isumaqatigiissut aalajangersakkanik minnerpaamik makkuninnga imaqassaaq:

- 1) §§ 20-21 malillugit paaqqinninersiutisiassat,
- 2) aningaasartuutaasinnaasut immikkut ittut allat,
- 3) taamaatitsinermut malittarisassat,
- 4) sillimmasiinermut tunngasut,
- 5) meeqqap inuusuttulluunniit suleqatigineqarnissaa,
- 6) suliatigut tapersersuineq,
- 7) nakkutillineq, siunersieqatigiittarneq ilinniartitaaneq, aamma
- 8) sulingiffeqartarneq.

Kapitali 4

Ilinniartitaaneq siunersieqatigiinnerlu

Tunngaviusumik pikkorissarneq

§ 16. §§ 1-3 malillugit ilaqutariit paarsisartut isumaginninnermut aqutsisoqarfiup aqqissuussaani akuerisaanilluunniit ilaqutariittut paarsisartuunissamut tunngaviusumik pikkorissartinneqassapput. Paarsisartutut angajoqqaajusussat tamarmik pikkorissarneq naammassisimassavaat.

Imm. 2. Ilaqutariit paarsisartut § 4 malillugu ilaqutariittut paarsisartutut akuersissummik siullerpaamik tunineqarnissamut atatillugu tunngaviusumik pikkorissartinneqassapput. Imaappoq ilaqutariit paarsisartut piffissap akuersissummik peqanngiffimmik kingorna ilaqutariittut paarsisartutut akuersissummik nutaamik qinnuteqarunik tunngaviusumik pikkorissaqqissanngillat. Pissutsilli immikkut ittut atuutsillugit taamaaliornissaq kommunalbestyrelsip piumasarisinnaavaa.

Imm. 3. Pissutsit immikkut ittut atuutinngippata ilaqutariit meeqqanik inuusuttunilluunniit paarsassaannik tigusitinnagit tunngaviusumik pikkorissarneq naammassineqarsimassaaq. Ilaqutariit paarsisartut pikkorissarnerminnik suli naammassinngitsut meeqqamik inuusuttumilluunniit najugaqartitsilerpata kommunalbestyrelse ilaqutariinnut paarsisartunut utaqqiisaagallartumik akuersissummik tunniussissaaq, matumalu kingorna pikkorissarneq piaarnerpaamik naammassineqassaaq.

Imm. 4. Tunngaviusumik pikkorissarnerup sivisussusaa minnerpaamik ullut pikkorissarfiusut ilivitsut sisamat naleqatigissavai.

Imm. 5. Tunngaviusumik pikkorissarnermut aningaasartuutit, matumani angalanermut akunninnernullu aningaasartuutit ilanngullugit, kommunalbestyrelsimit ilaqutariit paarsisartut najugaqarfigisaannit akilerneqassapput.

Imm. 6. § 9 malillugu tunngaviusumik pikkorissarnermik naammassinissimannginneq ilaqutariittut paarsisartunut akuersissutit utertitsinneqarnissaanik aalajangernissamut tunngaviusinnaavoq.

Ilinniaqqinneq

§ 17. § 4 malillugu kommunalbestyrelsip, ilaqutariinnut paarsisartunut akuersissummik ilaqutariinnut paarsisartunut tunniussisup, ilaqutariit paarsisartut ilinniaqqinnissaannik neqeroorfigissallugit pisussaaffigivaa. Ilaqutariit paarsisartut ilinniaqqinnermut peqataanissartik pisussaaffigaa.

Imm. 2. Imm. 1 malillugu ilinniaqqinneq isumaginninnermut aqutsisoqarfimmit neqeroorutigineqassaaq ingerlanneqarlunilu.

Imm. 3. Imm. 1 malillugu ilinniaqqinneq isumaginninnermut aqutsisoqarfimmit akuersinikkut kommunalbestyrelsimit neqeroorutigineqarsinnaavoq ingerlanneqarlunilu.

Imm. 4. Ilinniaqqinnermut aningaasartuutit, matumani angalanermut akunninnernullu aningaasartuutit, kommunalbestyrelsimit akilerneqassapput.

Siunersiueqatigiinneq suliampilu ilisimasalinnit tapersorneqarneq

§ 18. § 11 malillugu kommunalbestyrelse paarsisinnaanermik akuersissummik tunniussaqqartup ilaqutariit paarsisartut paarsinermi suliassamut naapertuuttumik siunersiueqateqartarnissaannik suliampilu ilisimasalinnit tapersorneqarnissaannut neqeroorfigissallugit pisussaaffigaa. Ilaqutariit paarsisartut siunersiueqatigiinnermi peqataanissartik pisussaaffigaa.

Imm. 2. Meeraq inuusuttorluunniit kommunimi allami ilaqutariinni paarsisartuni inissinneqarsimappat, kommunip inissiisup kommunalbestyrelse sinnerlugu siunersiueqateqartarnissaq tapersorneqartarnissarlup pillugit neqeroorfigineqarnissamik ilaqutariit paarsisartut kommunimi najugaqarfigisaani kommunalbestyrelse isumaqatigiissuteqarfigisinnaavaa.

Imm. 3. Imm. 2 malillugu siunersiueqateqartarnissamik suliampilu ilisimasalinnit tapersorneqarnissamik isumaqatigiissuteqartoqarsimappat, imm. 1 malillugu ilaqutariit paarsisartut,

paarsinerup suliassartaata annertussusianut naapertuuttumik, siunersiueqateqartarnermik suliamullu tunngasumik tapersorneqarnermik neqeroorfigineqartarnersut kommunip inissiisup nakkutigissallugu pisussaaffigaa.

Kapitali 5

Aningaasaqarnermi pissutsit

Nerisassarsiutissat, kaasarfimmiussat atisassarsiutissallu, allatsinnermut aki ilassutaasumillu tapiissutit.

§ 19. Kommunalbestyrelse inissiisoq, nerisassarsiutissanik, kaasarfimmiussanik atisassarsiutissanillu ilaqutariittut paarsisartunut, meeqqap inuusuttulluunniit pilersorneqarneranut atugassanik, akiliuteqartassaaq.

Imm. 2. Nerisassarsiutissat, kaasarfimmiussat atisassarsiutissallu qaammatikkaartumik siumoortumik akilerneqartassapput.

Imm. 3. Meeqqap inuusuttulluunniit ilaqutariittut paarsisartunut inissinneqarnerani allatsinneranut aki kommunalbestyrelsip akilissavaa.

Imm. 4. Kommunalbestyrelse ilaqutariit paarsisartut paarsinerannut atatillugu aningaasartuutitut ilassutaasunut tapiissuteqarsinnaavoq.

Imm. 5. Naalakkersuisoqarfiup isumaginninnermut akisussaasuusup nerisassarsiutissat, kaasarfimmiussat atisassarsiutissallu allatsinnermullu aki ukiumut ataasiarluni aalajangersartassavai tamanullu nalunaarutigalugit.

Ilaqutariit paarsisartut aningaasarsiaat

§ 20. Kommunalbestyrelsip inissiisup ilaqutariit paarsisartut paaqqinninersiutisiassa at ilissavai, taamaattoq imm. 3 takuuk. Paaqqinninersiutit tassaapput ilaqutariit paarsisartut akissarsiaassa at taamaammallu meeqqap inuusuttulluunniit pilersornissaanut atugassiaanngitsut.

Imm. 2. Ilaqutariit paarsisartut inuusuttumik suliniuteqareernermi malitseqartitsilluni suliniuteqarfigineqartumik najugaqartitsisut paaqqinninersiutisiaqartarput.

Imm. 3. Imm. 1 aamma 2 ilaqutariinnut inuusutissarsiutigalugu paarsisartunut atuutinngilaq.

Imm. 4. Kommunalbestyrelsip inissiisimasup aalajangersimappagu meeraq inuusuttorluunniit efterskolissasoq allatulluunniit atuarfimmiissasoq, meeqqap inuusuttulluunniit ilaqutariit paarsisui meeqqap inuusuttulluunniit atuarfimmiinnerata naammassivinnissaata tungaanut appartitanik akissarsiaqartinneqassapput, meeqqap inuusuttulluunniit atuarnerani piareersimasutut inissisimasussaammata.

Imm. 5. Meeqqap napparsimanerani ullormi siullermi sulinikkut aningaasarsiaassaagaluit annaasat tamakkerlugit akissarsititsissutigineqassapput.

§ 21. § 20 malillugu paaqqinninersiutisiat, qaammammut kingumoortumik tunniunneqartassapput.

Imm. 2. Naalackersuisoqarfiup isumaginninnermut akisussaasusup § 20 malillugu paaqqinninersiutisiat amerlassusissaat ukiumut ataasiarluni aalajangersartassavai.

Imm. 3 Imm. 2 malillugu meeqqamik inuusuttumilluunniit ilaqutariinnut paarsisartunut inissiineq, perorsaaneq isumassuinerlu eqqarsaatigalugit ilaqutariinnut paarsisartunut immikkut perorsaanikkut isumassuinikkullu suliniarnartuuppat paaqqinninersiutit naalackersuisoqarfimmit annertussuilerneqartut 700 pct-it tikillugit qaffanneqarnissaat kommunalbestyrelsip aalajangersinnaavaa.

Imm. 4. Nukinginnartumik sivikitsumik ullut 30-t tikillugit inissiisoqartillugu kommunalbestyrelse paaqqinninersiutisianik annertusisanik tunniussisassaaq.

§ 22. Kommunalbestyrelsip ilaqutariit inuussutissarsiutigalugu paarsisartut isumaqatigiissutit atuuttut naapertorlugit akissarsiaqartissavai.

Kapitali 6

Atuutilerfia

§ 23. Nalunaarut 1. januar 2020 atuutilissaaq.

Imm. 2. Tassunga peqatigitillugu pillugit Ilaqutariit paarsisartut pillugit Namminersornerullutik Oqartussat nalunaarutaat nr. 17, 8. november 2017-imeersoq atorunnaarsinneqarpoq.

Namminersorlutik Oqartussat, ulloq 10. oktober 2019

Martha Abelsen

/

Julie Præst Wilche